


Karu llakta Persiabimi Asueroga shuj  
jatun mandujmishka. Patsuj ishki  
chungu (120) llaktagunada manduga.



Shuj jatun p'ishtada rurusha paibuj  
mandujkunamu manchanai mikunada karaki  
chaubi watada Susa pueblobi tandanuku-  
gaguna. Ña p'ishta tukukiga Asueroga paibuj  
warmi Vasti shamuchun mandaga. Paiga  
k'ariguna shingashkada yachashami na kusada  
kazush niga. Chimunda jatun mandujka  
warmida manchanaidi p'iñashami yuyashaga  
'Vastiga ñaubamu ama ashtan ñukamu  
shamuchun.' Shinamunda mushuj reinada  
agllungu kallariga.




Chi llaktabi kausuj tuki k'uilla  
solteragunami reybud jatun wasimu  
kachashka gaga. K'arin narij  
purishka maijin shuj soltera jatun  
mandujbud ñaubuki alli rikurijmi  
Vasti warmij randi mandujbud reina  
tukusha gangamu.



Mandujbuj wasimu kachushka solteragunamunda shuj israelmundaga Ester shutimiga. Paibuj taita mamash pai uchilla gakidi wañushkamundami tío Mardoqueo iñachishkaga.

Kallariki ishkindi tandanukushkabi tíoga, "Ester, k'uillami gangui. Reyga kandami agllana gashkada yachani. Shinash kan israelmunda gashkadaga p'akta parlunguimu," niga.

Mardoqueo nishka shina Esterga chidaga pimush na parlugachu.




Chi solteraguna watagamaga k'uilla  
tukuchun nishami rey Asueroga alli  
mikunallagunada karachun mandaga.  
Chi solteragunadaga jatun mandujbuj  
warmigunada kuiduj eunucomi k'uillada  
allichisha kuidaga.

Shina ña wata p'aktakimi reyga chi  
tuki solteramunda shujta agllana gaga.  
Tukimunda yalli k'uilla gashkamunda  
Esterdami rey Asueroga aglluga.



Chi p'unllagunabi Mardoqueo jatun mandujbuj pungubi tiyagushami pungabi kuiduj Bigtán shinalladi Teres eunucoguna yallida p'iñarisha, jatun manduj Asueroga wañuchingu washalla parlanukujta uyaga.

Reyda wañuchingu parlanukujta uyasha Mardoqueo reina Estermu parlukimi ut'kada paibuj kusa Asueromu chida parlangu riga.



Chida parlakimi jatun mandujka paida  
ciertodi wañuchish nigushkada alli  
tapuga. Chi k'ipaga wañuchish nigushka  
shinadi gakimi chi ishki eunuco runa-  
gunadaga sipisha wañuchiga.

Shina tukushkadaga jatun manduj  
imada rurashkada escribishka  
librobimi escribishka sakiriga.




Chi tukushka k'ipaga jatun manduj  
Asueroga Agageobuj wawa  
wawapuramunda Hamedadaj churi  
Amandami alli nisha tuki mandujkuna-  
munda ashtan yalli mandanabi churaga.



Jatun mandujbuj wasi pungubi kuiduj tuki servijkunami Amanbuj ñaubuki kungurisha kumurigaguna. Jatun manduj Asuerolladimi chidaga mandashka gaga.

Ashtanbish Esterbuj tío israelmunda gasha Mardoqueoga kai mandashkadaga na kazugachu. Dioslladadi paiga kungurish niga.



P'unllandi jatun mandujta servisha  
pungubi kuidujkunaga Mardoqueodaga  
*"¿Ima nishadi jatun manduj  
mandashkada na kazungui?"*  
nisha tapuga. Shina rimagukish na  
kazugachu. Mardoqueoga Judamunda  
gashkadaga ñami parlashka gaga.



Chimunda kuidujkunaga Amanmuga,  
"Mardoqueoga israemundami;  
chimunda na kungurisha  
kumurisha," parlaga.

Paiguna shungubiga,  
"Amanga ¿Imadadi rurunga?  
¿P'iñangachu? ¿Mardoqueoda  
sakingachu? ¿Paida  
llakichingachu?" yuyagaguna.



Amanga paibuj ñaubuki na kungurijta,  
na llakirijta rikushami Mardoqueoda  
yallida p'iñariga.

Shina p'iñarisha Mardoqueolladi  
llakichinadaga na munagachu.  
Ashtanbish jatun manduj Asuero  
mandaguj llatagunabi kausaj tuki  
judamundagunadami wañuchinada  
yuyariga.



Chimunda Amanga jatun manduj Asuerodaga,  
"Kan mandaguj tuki llaktagunabi  
kausajkunapurabimi gaki, chibi ch'ikan  
ch'ikan kausajkuna tiyan. Shinalladi  
paigunaj mandashkagunash shujti  
llaktagunan rikukiga ch'ikanmi. Jatun  
manduj mandashkagunadash na  
kazungunachu. Kan jatun manduj gasha  
paiguna kausachun sakishaga ima allida  
na ruranguichu."

*"Tuki paigunada tukuchichun shuj mandashkada escribi. Shina rurakiga kanda kuchkida kushami."*




Aman shina nikimi jatun mandujka paibuj sortijasta llujshichisha, judamundagunada p'iñaj Amanmu kushaga,

*"Chi kuchkidaga kanlladi japilla.*

*Gentegunadash kan munashkada rurilla,"*

niga.

Jatun manduj Asuerobuj shutibi escribishami, jatun mandujbuj sortijaskun sellaga. Shamuj chungu kinsa (13) p'unllabi chungu ishki (12) killabimi tuki israelgunada wañuchisha, paigunaj charishkada apamuchunmi mandashka gaga.



Mardoqueoga tuki chigunada yachashami paibuj churanada llikisha aspichij churanada churarisha achpan kawirisha yallida llakirisha kaparisha waukisha pueblobi purigusha jatun mandujbuj pungugama chayaga.

Esteraga paibuj tío ima rurashkada yuyida japisha yallida llakirisha Mardoqueo aspichij churanada llujshichichun allida churachichun kachaga. Ashtanbish Mardoqueoga na uyagachu.



Mardoqueoga Esterbuj sirvij eunucomu ima llaki tukushkada parlaga. Shinalladi judamundagunada tukuchichun Susa pueblobi escribisha tukimu kushka copiadash Estermu kusha parlachunmi kuga. Shinalladi Esterbuj gentegunada ama wañuchichun reina gasha pai jatun mandujbujmu risha parlachunmi mañaga.



Shina parlakimi paibuj sirvij eunuco  
Mardoqueobujmu kutin richun Esterga,  
"Maijin gasha, jatun manduj na kayaki  
paida rikungaj wañunga. Na gashaga  
jatun mandujbuj kuri varada ñaubamu  
chutasha rikuchikimi na wañungachu.  
Chidaga tuki llaktagunabi kausajkunash  
yachanmi. Ñuka pai jatun mandujta  
rikungajka kai killaga na kayashkachuni,"  
nisha nichunmi kachaga.



Mardoqueoga Esterdaga,  
"¿Kanga, 'Ñukaga jatun mandujbuj  
wasibi kausuj gasha na wañushachu,'  
nisha yuyanguichari? ¡Ama shina  
yuyaringui! Kan parlangajkish  
mañagajkish na kambuj kusamu rikiga  
tukiguna wañunchimi. ¡Kambish!  
¿Imamundadi reina tukugangui? Kai  
llakimunda tukigunada kishpichingau  
tukunguimuchari.  
nichunmi kachaga.



Shina Esterga Mardoqueomunga,

*"Kai Susa pueblobi kausaj judamundagunada tandachi. Shina rurasha ñukamunda kinsa p'unlla, kinsa tutada na mikusha na ubiasha ayunichi. Ñukash ñukada servij k'arin narij purishka solteragunash shinadimi rurashun. Chi k'ipami jatun mandujkun parlangaj rini. Mandashkabi chimu na waigunachu niguchunbish, ñukada wañuchina gakash rinimi,"*

nichunmi kachaga.

Shina nikimi Mardoqueo chimunda rishaga Ester mandashka shinalladi tuki ruraga.



~~~

Original illustrations by Jim Padgett, © Sweet Publishing licensed under the terms of a Creative Commons Attribution-ShareAlike 3.0 Unported license.

[www.sweetpublishing.com](http://www.sweetpublishing.com)

~~~

Parte 1 es basada en el libro de Ester, capítulos **1-4**

Parte 2 es basada en el libro de Ester, capítulos 5-7

Parte 3 es basada en el libro de Ester, capítulos 8-10